

Il plan d'instrucziun ed ils mieds da scola

Conferenza generala dallas persunas d'instrucziun sursilvana

DA GIUSEP VENZIN / ANR

■ Referats, luvratoris, in gentar da cuminonza, la radunonza generala ed in hosp da sorpresa han las scolastas ed ils scolasts dalla Surselva gudiu a caschun dil di da romontsch la mesjamna ella Casa da sentupada dallas soras dominicanas a Glion. Il rapport dil president Francestg Friberg ei staus el center dalla radunonza il suentermiezdi. Quel documentescha il grond engaschi da sia persuna, denton era dall'ulteriura magistraglia en favor dil lungatg romontsch. Il Plan d'instrucziun 21 e la realisaziun da mieds d'instrucziun idiomatics han pretendiu quei engaschi. «Enconuschentamein ha era la secunda versiun dil P21 romontsch buca purtau la remedura spitgada, cunteneva ella – malgrad scursanida en sia dimensiun – facicamein aunc adina la medema substanza.» Damai ch'il departament d'educaziun ha numnau la Ligia Romontscha il partenari da discussiun en caussa damondas dil lungatg romontsch ed en special la damonda dil P21 seigi la suprastanza dalla Conferenza generala Surselva (CGS) sedrizzata a quella per procurar che ses giavischs vegnien tedlai. «La Ligia Romontscha ei semussada cooperativa ed ha priu serius las preoccupaziuns dalla CGS», ha il president saviu rapportar alla magistraglia en preschientscha dil secretari dalla LR Urs Cadruvi. Tenor indicaziuns dil cau dil departament Martin Jäger vegni el a suttemeter sia proposta aunc uonn alla regenza grischuna. «Ei ha pia danovamein num



Sandra Locher Benguerel, la presidenta dalla magistraglia grischuna, ha visitau la Conferenza generala Surselva presidiada da Francestg Friberg.

FOTO G. VENZIN

spitgar e lu analisar tgei ch'il niev Plan d'instrucziun 21 romontsch cuntegn.»

Cun daners dall'unìun

Ils mieds d'instrucziun matematica e geometria dil scalem primar existan

en tudestg ed en rumantsch grischun. Bugen havessen ils scolasts quels mieds els idioms ed ils presidents dalla Conferenza generala Surselva e Ladina ein sedrizza al departament culla supplica da realisar quels. Quel ha

denton vuliu saver nuot da quei. La scolasta Carin Cadruvi da Ruschein ha proponiu il settember da surdar alla suprastanza dalla CGS l'incumbenza da procurar per translatur, d'indemnisar quels e da metter las trans-

laziuns sin la pagina d'internet plat-on.ch. Tenor ina calculaziun cuosta la translaziun els treis idioms puter, valader e sursilvan 24 000 francs, pia 8000 francs per idiom. Alla radunonza dil venderdis ha Francestg Friberg fatg la proposta d'impunder 3000 francs dalla cassa dall'unìun e tscher-car ils ulteriurs 5000 francs da sponsurs.

Ina scolasta ed in scolast han deplo- rau la risposta negativa dil departament e supplicau da far ina nova emprova. Quei fetschi negin senn, ha il president constatau e la radunonza ha dau glich verda per la realisaziun dil project.

Informaziuns e luvratoris

Al di da romontsch han scolastas e scolasts udiu informaziuns da tut gener. Il collaborator dalla Ligia Romontscha Conradin Klais ha informau da resuns da questiunaris e dalla formaziun e la nova directura dad RTR Ladina Heimgartner ha risdau da sia interpresa en survetsch da pign e grond.

En otg luvratoris han scolastas e scolasts giu la caschun da seperfectuar ni da retscheiver novs impuls. Rilana Cadruvi ei sefatschentada en in da quels luvratoris per scolasts dalla 5avla e 6avla classa culla canzun populara romontscha. «Nossas canzuns popularas romontschas van tec a tec en emblidonna», ha ella constatau. La canzun populara romontscha mereti da vegnir tgirada. Ella ha dau tips co quei duei succeder.

Alla tscherca dils centaurs

Stina Hendry e Flurina Albin han scret il roman «Emalio»

DA GIUSEP VENZIN / ANR

■ Duas giuvnas scribentas da 16 onns ha Francestg Friberg annunziau sco hosp da sorpresa dalla Conferenza generala Surselva. Stina Hendry da Vella e Flurina Albin da Lumbrein ein quellas duas giuvnas ed ellas han legiu da lur roman «Emalio». Ei setratta d'ina historia da fantasia ch'ellas han scret sco scolaras da 13 onns. Treis onns hai allura cuzzau tochen ch'il cudisch ei staus madirs per la publicaziun. Anita Capaul, la menadra dalla

Chasa editura Rumantscha, ha raquintau il svilup dall'ovra ch'ei ius a pèr cul svilup dallas duas scribentas. In roman scret da duas auturas ei in'ovra extraordinaria. Las duas giuvnas han seschau inspirar da Harry Potter e d'alters cudischs da fantasia cun dialas ed uldauns.

Alla tscherca dils centaurs

Il retg smanatscha e conquista cun sia armada da dragants adina dapli regiuns e pievels. Era ils uldauns che vivan tochen ussa retratg egl uaul grond vegnan catschai pli e pli a cantun. La suletta via

da cumbatter il nausch ei da s'unir culs auters pievels e sperar silla forza ed il sustegn dils elements. Perquei semetta il giuven uldaun Emalio sin viadi alla tscherca dils centaurs, d'in pievel scumpariu gia daditg.

«Emalio» ei lectura per affons. Il roman da 360 paginas tschaffa denton era ils carschi e lai seprofundar quels en in mund magic. Elements crudeivels sebrattan cun elements carins. «Igl um vegl vul scappar, mo el vegn buca lunsch, in um cun manti ner setta ina lonscha. Cun in griu croda il vegl giun

plaun.» Gia all'entschatta tradeschan las auturas ch'ei setratta d'ina avventura misteriosa cun carstgauns e figuras fabulusas.

Era dalla carezia scrivau las duas auturas: «Loraia, Loraia, sperta! Ella vul denton buca tedlar. Entochen ch'ella leischna ora sin in crap bletsch e leva buca si pli. Emalio cuora neutier e gida si ella. Ella bragia. In mument miran els semplamein in sin l'auter. Lu emblidan els quei ch'els han fatg giu ed embratschan in l'auter.»

Scribenta, pictura e musicista

Stina Hendry ei carschida si a Vella ed ha frequentau leu la scola primara e secundara. Sia mumma deriva dalla Bassa ed aschia ei la buoba carschida si biling. Ella ha legiu gia fetg baul ils classichers da fantasia cugl agid da sia tatta ed era entschiet a scriver atgnas historias. Sper il scriver sededichescha Stina al malegiar. Sia famiglia ha surpriu l'alp da Vella e Stina ha passentau leu plirs onns la stad cun pertgirar ils animals.

Flurina Albin ei carschida si sco giuvna da treis soras a Lumbrein e frequentau leu ed a Vella la scola primara e secundara. Romontsch ha Flurina empriu en scola, a casa ha ella adina discurreu tudestg. Gia els emprems onns da scola ha ella scret cuortas historias romontschas. Ina secunda pissiun ei la musica. Flurina suna cornet e corn en es en duas musicas.

Omisdus auturas frequentan actualme in il gimnasi alla Scola cantunala grischuna.

La vernissascha dil cudisch «Emalio» ei sonda, ils 5 da december allas 10.30 a Vella ell'aula dalla casa da scola. Il cudisch da Flurina Albin e Stina Hendry, in roman cun 360 paginas fantasia, cuosta 29 francs ed ei en scadin cass in excellent regal da Nadal.


Era uonn concerts cun Simon Camartin

■ (anr/hh) Sco gia ils onns passai han treis concerts cul dirigent Simon Camartin da Mustér liug era uonn denter Nadal e Daniev el cantun Grischun. Ils 27 da december ha igl emprem concert liug a Vaz-sut, ils 28 da december a Mustér ed in di pli tard a Falera. D'udir ei igl «Academic Youth Symphony Orchestra» da L'viv. A Mustér e Falera se-presentan Anastasia Kornutyak (sopran) e Livio Russi (clarinetta) sco solists, a Vaz-sut Nils Kohler (clarinetta). Sco solist al clavazin ei Andriy Dragan d'udir. Simon Camartin ha semtgau in attractiv program cun musica bein adattada pils dis da fiasta. Aschia risguarda el cumposiziuns d'enconuschents cumponists sco Johann Strauss, Josef Strauss, Franz Schubert ni era Gioachino Rossini. La prevendita da biglietti ha entschiet. A Mustér sa vegnir fatg diever da quella ella Papetaria Hosang ed a Falera sur la homepage www.lafermata.ch ni tier l'informaziun turistica. A Vaz-sut vegn arranschau negina prevendita.

ARTG PERSUNAL

Gratulaziun a Flem: Maria Casutt da Flem sa festivar oz siu 95avel anniversari. Sia famiglia gratulescha e giavischta vivon tut il bien e buna sanadad.

Gratulaziuns a Schlans e Sagogn: Alfred Vincenz da Schlans sa festivar la fin december siu giubileum da 10 onns tier la Banca Raiffeisen Surselva. Ida Panier da Sagogn sa far fiasta la fin december sin il 15 avl onn da lavar tier il medem institut bancar. Il cussegl d'administraziun, il directori, las collavuraturas ed ils collavuratur da Sagogn sa far fiasta la fin december sin il 15 avl onn da lavar tier il medem institut bancar. Il cussegl d'administraziun, il directori, las collavuraturas ed ils collavuratur dalla Banca Raiffeisen Surselva gratuleschan als giubilers ed engrazian per la lavur prestada e per la biala ed emperneivla collavuraziun.



Stina Hendry e Flurina Albin (da seniester) han scret ella vegliadetgna da 13 onns in roman da fantasia. La vernissascha dil cudisch captivont ei sonda, ils 5 da december a Vella.

FOTO G. VENZIN